

Stichting Rancho a invita musico Paly Gamez pa start relacion cultural cu Guajira

ORANJESTAD – Presidente di Stichting Rancho, Clifford Rosa a realisa un bishita na Colombia, y den cuadro di nan compromiso pa fortalece e relacion cultural entre Aruba y Guajira, nan a invita e famoso musico di Riohacha, Alvaro Gamez Ramirez conoci artisticamente como “Paly Gamez” kende a yega nos isla ayera.

Presidente di fundacion Rancho a bisa cu e bishita aki sigur a cay den bon tera tanto na Guajira como na Aruba, ya cu “Paly Gamez” ta un musico cu a yega di toca na Aruba diferente biaha na final di decada 80 y inicio di 90.

“Esaki ta un di e prome intercambionan cultural-musical cu lo tuma lugha door di sr. Gamez. E tin un trayectoria hopi largo como musico”, el a laga sa. El a reseña cu sr. Gamez ta un embahador di



nos musica na Guajira; ya cu el a yega di toca varios cantica famoso di nos musiconan local entre nan e tema famoso y contagioso “Bolombonchi” di Robert Jeand’or. Pero tambe ritmo Caribeño di Tumba cu sr. Gamez a experiencia aki na Aruba den su

edad jong cu a yud’e pa e bira artisticamente grandi na Colombia.

Sr. Gamez ta un musico academico kende a realisa estudio y investigacion tocante musica tradicional di su ciudad natal Riohacha y folklore

di Guajira tambe riba e compositoran di e region Colombiano aki.

“E ta un momento hopi special cu nos por tin e persona aki na Aruba. E ta un inicio pa nos por documenta y haci mas investigacion riba e topico musical entre Aruba y

Guajira, especificamente Riohacha”, segun Sr. Rosa.

Nan a invita e artista internacional, sr. Gamez pa e dia di apertura di Stichting Rancho su oficina nobo cu lo tuma lugha diahuebs awor pa 6’or atardi na J.G. Emastraat 9 net patras di Museo Arkeologico of banda di e Hanchi di Caliki. Casualmente e ta cay riba fecha 20 di juli cu ta dia di independencia di Colombia, caminda e artista Gamez lo deleita publico cu su musica. P’esey fundacion Rancho ta mira e celebracion aki cu dobel proposito, e prome ta pa e sede nobo di e fundacion; y e di dos, nan lo trece un proyecto nobo tocante di e desaroyo economico di Rancho cu ta un tema cu nan lo sigui elabora riba dje.

E lo bay ta un actividad varia segun sr. Rosa cu lo determina e caminda di un proceso cu e fundacion ta canando pa mehora integralmente e bario historico di Rancho.